

FAMLE

G A E D B U K

FAMLE

G A E D B U K

Jos blong Jisas Kraes blong Ol Lata-dei Sent
I pablisim
Sol Lek Siti, Yuta

© 1992, 1999, 2001, 2006 i kam long Intellectual Reserve, Inc.

Oli holem evri raet

Oli printim long Yunaeted Stet long Amerika

Oli letem long Inglis: 2/06

Oli letem translesen: 2/06

Translesen blong *Family Guidebook*

Bislama

Ol samting we i stap insaed

“Famle: Wan Ofisol Toktok i go long Wol”	iv
Oganaeseses mo Stamba Tingting blong Famle	1
Tijim Gospel insaed long Hom	5
Fulfilim Ol Responsabiliti blong Famle	14
Lidasip Trening	18
Holem Ol Wosip Seves long Hom (Blong Ol Famle we oli stap long Ol Eria We i Longwe)	19
Ol Odinens mo Blesing blong Prishud	21
Blong Kasem Ol Jos Materioli mo Ples blong Faenem Infomesen long saed blong Famle Histri	30

“Famle: Wan Ofisol Toktok i go long Wol”

Long 1995, Fas Presidensi mo Kworom blong Olgeta Twelef Aposol oli bin givimaot “Famle: Wan Ofisol Toktok i go long Wol.” Ofisol toktok ia hem i toktok we i talemaot mo i konfemem ol doktrin mo ol praktis blong ol profet we oli stap riptim truaot long histri blong Jos. Hem i karem ol prinsipol we oli impoten tumas blong wan i mas gat blong save stap glad mo stap gud blong evri famle. Ol memba blong famle oli mas stadi long ofisol toktok ia mo oli mas laef folem ol tingting blong hem.

“Mifala long Fas Presidensi mo Kaonsel blong Olgeta Twelef Aposol blong Jos blong Jisas Kraes blong Ol Lata-dei Sent, i stap talemaot tabu tok ia se mared bitwin man mo woman hem i wan samting we God i givim wetem paoa mo atoriti, mo famle hem i stamba blong plan blong Krieta, blong ol pikinini blong Hem oli save gobak stap long ples blong ol kasem taem we i no save finis.

“Evri man mo woman oli mekem olgeta folem imej blong God. Wanwan long olgeta i wan spirit pikinini boe o spirit pikinini gel blong papa wetem mama long heven we oli laekem olgeta tumas, mo from we oli olsem wan spirit, wanwan long olgeta i gat gud-fala fasin mo oli gat bigfala janis blong save kam olsem God. Blong stap olsem man o woman, hem i wan stamba samting we i save talem stret hu nao hem i wan man o wan woman long ol tri defren laef we i stap, hemia laef bifo yumi kam long wol ia, laef long wol ia, mo laef we bae i kam afta mo from wanem hem i olsem.

“Long laef bifo laef blong wol ia, ol spirit pikinini boe mo ol spirit pikinini gel oli bin save God mo oli stap wosipim Hem olsem Papa blong olgeta We I No Save Finis. Oli agri wetem glad hat long plan blong Hem, we i talem se ol pikinini blong Hem oli mas gat wan bodi blong mit mo bun, mo kasem eksperiens long wol ia blong save kam stret, mo long en, bae oli gat raet blong kasem laef ia we i no save finis. Plan blong God blong stap hapi i mekem se fasin blong holemtaet famle tugeta i save gohed afta long ded. Ol tabu odinens mo ol kavenan we i gat insaed long ol tabu tempol i mekem rod i klia long wanwan man o woman i save gobak long weaples God i stap mo ol famle i save joen tugeta kasem taem we i no save finis.

“Fasfala komanmen we God i bin givim long Adam mo Iv hem i blong save kam hasban mo waef, mo tu olsem wan papa mo mama. Mifala i stap talemaot se komanmen blong God long ol pikinini blong Hem blong kam plante mo fulumap wol ia, i stap

yet naoia. Mifala i stap gohed yet blong talemaot se God i givim komanmen ia se tabu paoa blong mekem pikinini i mas tekples nomo bitwin man mo woman we tufala i bin mared folem loa olsem hasban mo waef.

“Mifala i stap talemaot naoia se fasin we oli mekem laef long wol ia, hem i kam long God. Mifala i stap talemaot tru tok ia se laef hem i tabu mo hem i impoten insaed long plan ia blong God we i no save finis.

“Hasban mo waef tufala i gat wan strong mo tabu wok blong lavem mo lukaotem gud wanwan long tufala mo ol pikinini blong tufala. ‘Ol pikinini oli olsem wan presen we Lod i givim’ (Ol Sam 127::3). Ol papa mo mama oli gat wan tabu wok blong lukaotem gud pikinini blong olgeta wetem lav mo fasin blong stap stret oltaem, blong givim long olgeta ol samting we oli nidim long saed blong spirit mo long saed blong bodi, blong tijim olgeta blong lavem mo sevem wanwan long olgeta, blong folem ol komanmen blong God, mo blong kam olsem ol sitisen we oli folem ol loa blong kantri we oli laef long hem. God bae i jajem ol hasban mo ol waef—ol mama mo ol papa, sapos oli no mekem ol samting ia we oli sapos blong mekem.

“Famle hem i wan samting we God i givim wetem paoa mo atoriti. Mared bitwin man mo woman hem i wan stamba samting folem plan ia blong

Hem we i no save finis. Ol pikinini oli gat raet blong bon insaed long mared laef blong papa mo mama. Oli gat raet tu blong grup long han blong papa mo mama we tufala i agri mo folem ol promes we tufala i bin mekem long mared blong tufala wetem fasin blong stap fetful long tufala oltaem. Hapines insaed long famle laef i gat gudfala janis blong kam tru sapos laef insaed long famle i stanap long ol tijing blong Lod Jisas Kraes. I gat sakses oltaem long ol mared laef mo famle, taem oli folem ol stamba tingting blong fet, prea, sakem sin, fasin blong fogif, respek, lav, fasin blong kea, wok mo ol samting o pleplei we oli gud. Folem plan blong God, ol papa oli mas lidim ol famle blong olgeta wetem lav mo fasin blong stap stret oltaem. Oli gat wok ia tu, blong luk se ol famle blong olgeta i gat proteksen mo evri samting we oli nidim long laef. Ol fas wok blong wan mama hem i blong lukaot, lisin, givim ol gudfala toktok, mo givim kea long saed blong spirit mo bodi taem pikinini i stap grup. Insaed long ol tabu wok ia, ol papa mo mama oli mas helpem wanwan long olgeta, olsem we tufala i wan. Handikap, ded o ol narafala samting, i save mekem se i gat jenis long wanem we wan papa o mama i mekem blong lukaotem famle. Olgeta famle i mas givim help sapos i gat nid.

“Yufala i mas lukaot: We oli stap brekem ol kavenan blong jastiti (klin laef), stap mekem nogud long ol man,

woman o pikinini blong olgeta, mo oli no mekem evri famle wok we oli mas mekem, mifala i talem se yufala i mas lukaot from God bae i jajem yufala from ol samting ia. Mo tu mifala i wantem letem yufala i save se seraot blong famle bae i mekem se wanwan man o woman, ol komiuniti, mo ol kantri bae oli fesem wan taem we i had tumas olsem we ol profet blong yumi bifo mo naoia oli stap talem.

“Mifala i askem ol lida mo ol wokman blong Gavman long evri ples, blong tokbaot moa mo enkarejem ol pipol blong mas mekem olgeta samting ia we i blong holemtaet mo mekem famle i kam strong moa, blong famle i kam wan grup we i stamba blong sosaeti.” (*Ensign*, Nov. 1995, 102).

Oganaesesen mo Stamba Tingting blong Famle



Oganaesesen

Famle i tabu insaed long Jos blong Jisas Kraes blong Ol Lata-dei Sent mo hem i yunit we i moa impoten long saed blong sosol, long taem ia mo taem we i no save finis. God i bin putum ol famle i stap blong oli givim hapines long ol pikinini blong Hem;



blong letem olgeta pikinini blong Hem oli lanem ol stret prinsipol long wan ples we i gat lav, mo blong priperem olgeta long laef ia we i no save finis.

Hom i nambawan ples blong tijim, lanem, mo praktisim ol gospel prinsipol. Long ples ia nao, wanwan man mo woman i lanem olsem wanem blong kasem mo givim kakae, klos, haos mo ol nara samting we wan i mas gat long laef. Papa mo mama, olsem tufala semmak patna, tufala i mas helpem wanwan memba blong famle blong:

- Lukaotem trutok mo mekem fet long God i kam antap.
- Sakemaot ol sin, baptaes blong sakemaot ol sin, kam wan memba

blong Jos blong Jisas Kraes blong Ol Lata-dei Sent, mo kasem Tabu Spirit.

- Obei ol komanmen blong God, stadi gud long ol skripja, mekem ol prea blong evri dei, mo sevem ol narawan.
- Serem gospel wetem ol narawan.
- Kasem endaomen mo mared insaed long tempol blong taem we i no save finis wetem wan kompanion we i stret mo gud, mekem wan hapi hom blong famle mo sapotem famle wetem lav mo sakrifaes.



- Lukaotem infomesen long saed blong ol bubu we oli ded finis mo mekem ol tempol odinens blong olgeta.



- Givim kakae we i nid long saed blong spirit, sosol, bodi mo long saed blong helt mo filing.

Wan papa i prisaed ova long famle mo hem i responsibol blong tijim ol piki-nini mo givim ol samting blong laef we famle i nidim. Wan papa insaed long Jos, we i stret mo gud, i save gat janis blong holem prishud, we hem i paoa mo atoriti blong mekem wok long nem blong God. Wetem paoa mo atoriti ia, papa i kam olsem prishud lida blong famle blong hem. Hem i lidim famle blong hem blong oli rere blong gobak stap long ples blong Papa blong yumi long Heven. Waef blong hem i kompanion, patna mo kaonsela blong hem we i impoten tumas. Hasban mo waef i mas kaonsel tugeta long saed blong evri samting we i save kasem famle mo hom.

Papa i mas lukluk long ol nid long saed blong spirit blong famle blong hem. Hem i mas luk se oli kasem tijing blong gospel blong Jisas Kraes mo hem i mas mekem evri samting we hem i save mekem blong leftemap tingting blong olgeta mo helpem olgeta blong obei long ol komanmen blong Lod.

Wan papa we i holem prishud i save blesem ol memba blong famle blong hem mo i givim kakae long saed blong spirit. Wetem atoriti blong prishud mo *wetem raet blong prishud i kam long lida blong hem*, papa ia i save:

1. Givim nem mo blesem ol pikinini.
2. Baptaesem ol pikinini (mo ol narawan).

3. Konfemem ol pikinini (mo ol narawan) blong oli kam memba blong Jos mo givim olgeta Tabu Spirit.
4. Givim prishud long ol boe blong hem (mo ol narawan) mo odenem olgeta long ol ofis blong prishud.
5. Blesem mo pasem sakramen.
6. Dediketem ol gref.

Nating hem i no gat raet we i kam long prishud lida blong hem, wan papa we i holem Melkesedek Prishud i save konsekretem oel mo blesem ol memba blong famle blong hem mo ol narawan taem oli sik mo givim olgeta spesel blesing long ol nara taem, taem i gat nid. (Luk long ol pej 21–29) blong gaedbuk ia blong kasem ol toksave long saed blong mekem ol odinens blong prishud mo givim ol blesing blong prishud.)

Papa i mas luk se famle blong hem i mas strong long tri besik responsabiliti:

1. Blong famle mo wanwan man i rere long saed blong spirit mo long saed blong ol samting blong wol.
2. Serem gospel.
3. Famle histri mo ol tempol odinens blong olgeta we oli laef mo olgeta we oli ded finis.

Mama i semmak long hasban blong hem olsem patna mo kaonsela blong hem. Hem i helpem hem blong tijim ol pikinini blong tufala long saed blong ol loa blong God. Sapos i no gat papa long hom, mama i prisaed ova long famle.

Papa mo mama i mas kam wan long stamba tingting. Stamba tingting blong tufala i blong mekem ol memba blong famle oli rere blong oli gobak long Papa blong yumi long Heven. Tufala i mas kam wan, taem oli stap wok i go from stamba tingting ia. Lod i bin stanemap Jos blong helpem ol papa mo mama blong tijim mo luk-aotem gud ol famle blong olgeta.

Taem ol pikinini oli kam insaed long wan famle, papa mo mama i mas lavem olgeta, tijim olgeta long ol trutok blong gospel, mo stap olsem eksampol blong wan laef we i stret mo gud. Ol pikinini oli mas lanem mo kipim ol komanmen blong God. Oli mas givim ona mo obei long papa mo mama blong olgeta.

Paoa blong Jos i dipen long ol famle mo long wanwan man we i laef folem gospel blong Jisas Kraes. Blong save hamas nao wan famle i save glad long ol blesing blong gospel bae i dipen bigwan long olsem wanem nao papa mo mama oli andastanem mo oli mekem wok blong olgeta olsem papa mo mama. Jos i neva gat tingting blong givim ol program o wok long ol papa mo mama we bae i mekem olgeta oli nomo tingting nating blong mekem wok blong olgeta olsem papa mo mama.

Stamba Tingting

From se Papa blong yumi long Heven i lavem yumi, Hem i wantem yumi blong yumi kam olsem Hem. Blong helpem yumi, Hem i givim long yumi

wan plan blong folem we i folem ol bigfala loa blong Trutok. Olgeta we oli lanem abaot plan ia mo oli folem wetem fet, oli save kam olsem Papa blong yumi long Heven wan dei mo oli save glad long laef we Hem i stap laef long hem.

Pat blong plan ia, hem i blong yumi lego heven mo kam long wol. Long ples ia, yumi kasem wan bodi blong mit mo bun, yumi lanem samting tru long ol eksperiens, mo yumi pruvum yumi se yumi stret mo gud blong

yumi save stap bakegen wetem God long ples blong Hem. Yumi pruvum yumi se yumi stret mo gud taem yumi jusum blong kipim ol loa blong Hem. (Luk long Abraham 3:23–25; 2 Nifae 2:27.)

Blong helpem yumi blong mekem yumiwan i rere blong laef wetem Hem, Papa blong yumi long Heven i oganaesem yumi long ol famle. Tru long ol tabu odinens mo kavenan, ol famle blong yumi oli save stap tugeta blong taem we i no save finis.

Tijim Gospel insaed long Hom



Tijim Ol Pikinini wetem Fasin blong Kaen mo Lav

Lod i givim komanmen long ol papa mo mama blong tijim gospel long ol pikinini blong olgeta. Hem i bin talem:

Sapos ol papa mo mama oli gat ol pikinini long Saeon o insaed long ol stek blong Saeon we oli oganaesem mo oli no tijim ol pikinini ia blong andastanem ol doktrin blong fasin blong sakem sin; blong gat fet long Kraes, Pikinini blong God we i laef; mo blong baptaes mo kasem presen we i Tabu Spirit taem oli putum han antap long hed taem oli gat eit yia, sin ia bae i stap long hed blong ol papa mo mama blong olgeta.

Hemia bae i stap olsem wan loa long ol man mo woman blong Saeon mo long eni long Ol Stek blong Saeon we bae oli oganaesem.

Ol pikinini blong olgeta oli mas kasem baptaes from ol sin blong olgeta taem oli gat eit yia, mo oli mas kasem presen we i Tabu Spirit taem oli putum han antap long hed blong olgeta.

Mo ol papa mo mama oli mas tijim tu ol pikinini blong olgeta blong oli prea mo wokbaot stret long fored blong Lod (luk long D&C 68:25–28).

Ol papa mo mama oli mas tij wetem fasin blong kaen mo lav, mo stap tingbaot kaonsel blong Aposol Pol blong oli, “mas lukaot gud long olgeta. [Oli] mas stretem olgeta, mo [oli] mas tijim

olgeta, olsem we Masta blong yumi i stap stretem yumi, i stap tijim yumi” (Efesas 6:4).

Famle Skripja Stadi

Yumi save kam olsem Papa blong yumi long Heven mo stap glad long laef we Hem i stap laef long hem taem yumi stap kipim ol loa we blesing ia i stap long hem (luk long D&C 130:20–21). Bifo yumi save laef folem ol loa ia, yumi mas save se ol loa ia, oli wanem. Hem i no posibol blong wan man o woman i save sef taem hem i no save samting (luk long D&C 131:6).

Jisas Kraes i lida blong yumi mo Hem nao i givim ol loa long yumi. Hem i save rod mo ol loa we yumi mas kipim, mo Hem i invaetem wanwan long yumi blong folem Hem. Hem i bin talem, “Mi nao rod ya, mi mi stamba blong trutok, mo mi stamba blong laef. I no gat man i save kam long Papa blong mi sipos mi mi no tekem hem i kam” (Jon 14:6). Blong kam olsem Papa blong yumi blong Heven mo blong gobak long Hem, yumi mas lanem ol tijing blong Jisas mo folem olgeta tijing ia. Yumi gat ol skripja blong helpem yumi blong yumi save lanem abaot laef, ol tijing, mo ol komanmen blong Jisas Kraes.

Ol fo buk we Jos i akseptem olsem ol skripja oli Baebol, Buk blong Momon, Doctrine and Covenants, mo Pearl of Great Price. Oli eksplenem ol loa blong gospel mo ol standet we yumi mas folem; mo blong folem ol standet

ia bae yumi save skelem gud evri tingting blong yumi, evri aksen blong yumi, mo evri tijing blong yumi. Oli helpem yumi blong yumi lanem abaot laef mo ol tijing blong Jisas Kraes mo oli givim ol eksampol blong ol pipol we oli bin gat fet long God mo oli bin kipim ol komanmen blong Hem.

Jisas i bin tijim yumi blong yumi lukaotem mo stadi long ol skripja (luk long Jon 5:39; 3 Nifae 23:1; D&C 88:118).

Ol famle oli mas stadi tugeta long ol skripja evri taem blong lanem mo folem ol tijing blong Lod. Ol papa mo mama oli mas karem ol famle blong olgeta i kam wanples long wan stret taem evri dei blong ridim mo tokbaot ol skripja. Wanwan memba blong famle we i save rid i mas gat wan janis blong ridim ol skripja.



Wan memba blong famle i save givim wan prea bifo skripja riding mo askem Papa long Heven blong blesem wanwan long olgeta blong andastanem wanem nao bae oli ridim mo blong oli save kasem wan testemoni long wanem we oli ridim. Ol famle oli save mekem famle prea blong olgeta afta long skripja riding.

Taem ol famle oli stap ridim mo tingting strong long ol skripja, bae olgeta oli wantem blong kam moa olsem Sevya mo bae oli faenem wan hapines we i moa bigwan mo bae oli faenem pis long laef blong olgeta.

Ol Famle Prea mo Prea blong Wanwan Man

Wanwan long yumi i mas lanem olsem wanem blong toktok long Papa blong yumi long Heven tru long prea. Hem i lavem yumi mo Hem i wantem yumi blong toktok long Hem. Hem i wantem yumi blong yumi talem tangkyu long Hem long ol blesing we yumi kasem mo yumi askem help blong Hem mo blong Hem i lidim yumi. Hem, bae i helpem yumi taem yumi askem Hem. Plante taem, taem yumi prea, yumi stap benem hed i go daon mo klosem ol ae blong yumi taem yumi nildaon, sidaon o yumi stanap.

Yumi mas tingbaot fo impoten prinsipol taem yumi prea:

1. Yumi statem prea blong yumi taem yumi stap toktok long Papa blong yumi long Heven: "Papa blong mifala long Heven . . ."
2. Yumi talem tangkyu long Papa blong yumi long Heven from ol samting we Hem i givim long yumi: "Mifala i talem tangkyu long Yu Papa . . ."
3. Yumi askem Hem long ol help we yumi nidim: "Mifala i askem Yu Papa . . ."

4. Yumi klosem prea blong yumi long nem blong Sevya: "Long nem blong Jisas Kraes, amen."

Ol prea blong yumi i no nid blong mas folem ol fofala step ia oltaem, be i gud blong gat olgeta long maen blong yumi from se bae i helpem yumi blong save olsem wanem blong prea. Yumi mas oltaem statem mo klosem ol prea blong yumi wetem fas mo las step. Be wanem we yumi talem long medel, hem i dipen nomo long wanem yumi filim se hem i moa impoten. Samtaem bae yumi wantem spenem fulap taem long prea blong yumi blong talem tangkyu long Papa blong yumi long Heven. Long sam nara taem bae yumi wantem blong spenem fulap taem blong askem help blong Hem.



Ol Prea blong Wanwan Man

Wanwan man o woman i mas prea hemwan wan taem long evri moning mo wan taem long evri naet. Ol papa mo mama oli mas tijim ol pikinini

blong olgeta blong oli talem ol prea blong olgetawan stat long taem we oli save toktok. Ol papa mo mama oli save tijim ol pikinini olsem wanem blong prea taem oli nildaon wetem olgeta mo mekem olgeta oli ripitim ol toktok wan afta wan. Sapos yu mekem olsem ia, bae i no longtaem ol pikinini oli save talem prea blong olgeta, olgetawan nomo.

Ol Famle Prea



Evri famle i mas gat wan famle prea long wan dei. Ful famle i nil tugeta, mo hed blong famle i givim prea o hem i save askem wan memba blong famle blong givim prea ia. Evriwan i mas gat wan gud janis blong save givim prea. Ol smol pikinini oli save talem prea tu, wetem help blong papa mo mama. Taem blong famle prea i wan gudfala taem blong tijim ol pikinini olsem wanem blong prea mo blong tijim ol gudfala prinsipol olsem fet long God, fasin blong tingting i stap daon, mo lav.

Ol Spesel Prea

Ol papa mo mama oli mas tijim ol pikinini blong olgeta se God i stap rere oltaem blong lisiin long ol prea blong olgeta. Antap long ol prea blong olgetawan mo famle prea, oli save prea long eni taem, taem oli harem se oli nidim wan spesel help o oli wantem talem tangkyu long wan samting.

Blesem Kakae



Ol papa mo mama oli mas luk se ol memba blong famle oli lanem olsem wanem blong talem tangkyu long God long kakae mo askem se bae Hem i blesem bifo oli kakae. Wanwan man, mo i tekem tu ol yangfala pikinini, oli mas gat taem blong ol blong givim blesing ia. Blong givim prea blong blesem kakae i helpem papa mo mama mo ol pikinini blong oli save talem tangkyu long Papa blong yumi long Heven long ol samting.

Famle Haos Naet

Famle haos naet i blong evriwan, i tekem tu ol kapol we oli jes mared, ol papa mo mama wetem ol pikinini blong olgeta, ol singgel papa mo

mama wetem ol pikinini blong olgeta, ol papa mo mama we oli no gat pikinini long hom, ol singel adalt we oli grup tugeta, mo olgeta we oli stap olgetawan nomo o oli stap wetem ol fren we oli serem rum tugeta. Evriwan, nomata wanem kaen taem oli stap fesem, bae oli save gat blesing taem oli stap holem ol famle haos naet blong olgeta. Jos i kipim Mandei naet i fri long ol nara aktiviti blong ol famle oli stap tugeta long famle haos naet.



Fas Presidensi i bin talem: “Mifala i promesem yufala se bae yufala i save kasem ol bigfala blesing sapos yufala i folem toktok blong Lod mo yufala i stap holem famle haos naet evri wik. Mifala i stap prea oltaem se bae ol papa mo mama insaed long Jos bae oli save akseptem wok ia blong olgeta blong tijim mo givim eksampol blong gospel prinsipol long ol pikinini blong olgeta. Bae God i blesem yufala taem yufala i stap wok gud long impoten wok ia” (“Message from the First Presidency,” *Family Home Evening Resource Book* [1983], iv).

Olsem petriak blong famle blong hem, papa i prisaed long taem blong

famle haos naet. Long taem papa i no stap, mama nao i prisaed. Ol papa mo mama oli kondaktem o oli askem wan memba blong famle blong kondaktem famle haos naet. Olgeta oli tijim lesen o oli askem ol pikinini blong olgeta we oli bigwan inaf, blong tij. Evriwan we oli bigwan inaf oli mas gat janis blong tekempat. Ol yangfala pikinini oli save help long saed blong lidim miusik, talem sam skripja, givim ansa long sam kwestin, holem ol pikja, serem ol smol kakae, mo mekem prea.

Wan tingting blong olsem wanem nao yu save mekem famle haos naet, i go olsem:

- Fas singsing (i kam long famle)
- Fas prea (i kam long wan memba blong famle)
- Wan poem o wan skripja riding (i kam long wan memba blong famle)
- Lesen (i kam long papa, mama o wan bigfala pikinini)
- Aktiviti (we wan memba blong famle i lidim mo evri nara memba blong famle oli tekem pat long hem)
- Las singsing (i kam long famle)
- Las prea (i kam long wan memba blong famle)
- Smol kakae mo dring

Wan famle i save holem famle haos naet long plante nara kaen fasin. Eni aktiviti we i karem famle i kam tugeta, we i mekem lav blong olgeta long wanwan long olgeta i kam strong moa, we i helpem olgeta blong oli

kam kolosap moa long Papa blong Heven, mo we i leftemap tingting blong olgeta blong oli laef long laef we i stret mo gud i save kamaot long famle haos naet. Sam eksampol long ol aktiviti ia i gat, ridim ol skripja, tokbaot gospel, serem testemoni, mekem wan seves projek, singsing tugeta, go long wan piknik, pleplei long wan pleplei blong famle, mo wokbaot. Evri famle haos naet i mas gat prea.

Ol lesen blong famle haos naet i save stap long ol skripja, ol toktok blong ol profet blong ol las dei, speselwan nao ol toktok long taem blong jeneral konfrens; mo ol eksperiens mo testemoni blong yuwan. Plante long ol lesen oli mas lukluk long taem we Jisas i bon, laef blong Hem, ol tijjing blong Hem mo Atonmen blong Sevy. Ol buk ia; *Olgeta Gospel Prinsipol, Gospel Fundamentals, True to the Faith, Blong Ol Yut Oli Kam Strong*, mo ol magasin blong Jos oli gat insaed sam topik mo sam nara infomesen we oli save kam pat blong ol lesen long famle haos naet.

Sam tingting blong wanem nao blong tokbaot long haos naet, i go olsem:

- Plan blong fasin blong sevem man
- Laef mo ol tijjing blong Jisas
- Fasin blong sakem sin
- Prea
- Livim kakae
- Tok blong Waes
- Ol standet blong Lod abaot ol gudfala fasin

- Mining blong sakramen
- Taeting
- Fasin blong talem tangkyu
- Onesti
- Respek long God mo long ol samting we Hem i mekem
- Rere long baptaes, prishud odinesen, o mared
- Rere blong go insaed long tempol
- Ridim ol skripja
- Kipim Sabat dei i tabu
- Fogivim ol narawan
- Kasem mo serem wan testemoni
- Serem gospel long ol narawan
- Putum tugeta ol famle histri
- Andastanem mo akseptem ded
- Strettem ol famle problem
- Lukaotem ol mane blong famle
- Serem ol wok blong famle insaed long haos
- Laekem mo stap glad long miusik

Ol Holidei mo Ol Spesel Taem

Long ol holidei mo ol spesel taem, olsem Krismas; Ista; dei blong taem we prishud i kambak long wol; ol konfrens; taem wan memba blong famle i go long misin; o taem wan i bon, baptaes, o odinesen blong wan memba blong famle, ol taem ia, oli ol gudfala taem blong tijim ol trutok blong gospel.

Ol Taeting mo Ofring



Lod i komandem ol pipol blong Hem blong obei loa blong taeting mo stap klin inaf long ol blesing we Hem i bin promesem (luk long Malakae 3:8–11).

Wan gudfala taem blong papa mo mama i tijim loa blong taeting mo ol ofring i long taem we tufala i pem taeting mo ofring blong tufala. Ol pikinini oli stap lukluk wanem oli luk papa mo mama i mekem. Ol pikinini we oli stap kasem smol mane oli mas pem wan taeting long hem. Wanwan pikinini i sud gat tri defren kontena blong mane: wan blong taeting, wan blong go long misin mo wan blong oli spenem mane. Evri taem ol pikinini oli kasem mane, oli mas lanem blong putum ten pesen long bank blong taeting fastaem, afta nao oli putum smol mane i go long bank blong go long misin, mo haf mane we i stap bae oli save putum i go long bank blong spenem mane.

Taem ol pikinini oli pem taeting, ol papa mo mama oli mas tijim olgeta blong fulumap fom blong taeting, putum i go insaed long envelop wetem mane, mo givim o sendem

envelop i go long wan memba blong bisoprik o branj presidensi blong olgeta. Ol famle we oli stap long wan eria we i longwe oli mas givim taeting long prishud lida blong olgeta we oli bin putum hem blong i stap blong lukaotem olgeta.

Ol Storian long Taem blong Kakae

Ol taem blong kakae oli ol gudfala taem tu blong tokbaot gospel. Ol smol pikinini oli laekem blong askem mo givim ansa long ol kwestin blong olgeta. Taem oli no save ol ansa, papa mo mama oli save givim ol sot ansa mo tijim gospel. I no nid blong tokbaot gospel long evri taem blong kakae, be ol kaen storian olsem long tu (2) taem o tri(3) taem long wan wik bae i helpem famle blong lanem gospel.

Ol Stori long Taem blong Go Slip

From se plante long ol pikinini oli laekem ol stori long taem blong slip, hemia tu hem i wan gudfala taem blong tijim gospel taem yu stap talem ol stori o taem yu ridim ol stori long skripja, ol buk blong Jos o taem yu serem wan eksperiens blong yu. Ol stori long saed blong onesti, fasin blong serem samting, mo gat fasin blong stap kaen i stap tijim ol impoten gospel prinsipol.

Wok Tugeta

I gat plante janis blong save tijim gospel i kamaot taem ol famle oli wok



tugeta raon long haos. Taem yufala i stap klinim haos o taem yufala i wok aotsaed long yad o garen; olsem eksampol papa mo mama i mas tekem evri janis blong tokbaot gospel. Pikinini bae oltaem i askem ol kwestin. Ol papa mo mama oli mas tekem taem blong givim ol sot ansa. Ol toktok olsem “Yu wan gudfala wokman. Mi save se Papa long Heven hem i praod long yu” o “luk ol naesfala klaod we Papa long Heven i mekem” ol toktok olsem i save mekem se ol pikinini oli gat fasin ia blong save talem tangkyu long Papa blong Heven mo oli save gat strong tingting se Hem i tru.

Ol Famle Kaonsel



Ol papa mo mama oli save singaotem ol memba blong famle i kam tugeta

long wan famle kaonsel. Ol famle oli save yusum ol kaonsel miting ia blong putum sam stamba tingting, stretem sam famle problem, tokbaot mane, mekem sam plan, sapotem mo mekem wanwan i kam strong moa, serem testemoni, mo prea from wanwan long olgeta. Yufala i save holem kaonsel eni taem, taem i gat nid. Ol papa mo mama oli save holem wan famle kaonsel evri Sandei o wetem Famle Haos Naet. Long ol taem ia, hem i impoten blong gat respek long tingting mo filing blong ol narawan blong mekem se ol famle kaonsel i gud.

Ol Praevet Intaviu



Plante papa mo mama oli faenem se taem oli mekem ol praevet intaviu oltaem wetem wanwan pikinini, hem i helpem ol papa mo mama blong oli kam moa kolosap long ol pikinini blong olgeta, blong leftemap tingting blong olgeta, mo tijim gospel long olgeta. Ol intaviu olsem i save stap olsem wan nomol intaviu mo oli save holem plante taem.

Papa mo mama i mas soem mo talem-aot lav mo strong tingting we tufala i gat long pikinini blong tufala, mo pikinini i mas gat wan janis blong talem-aot tingting o filing blong hem long eni samting, problem, o wan eksperiens blong hem. Papa mo mama i mas lisin gud mo i mas lukluk long ol problem mo toktok blong pikinini wetem strong tingting. Papa mo mama mo pikinini i save prea tugeta. Ol problem we i kamaot long intaviu we i tekem tu sam nara memba blong famle, oli save stretem long nekis famle haos naet.

Ol Famle Aktiviti

Ol papa mo mama oli mas oltaem putum taem blong ful famle i mekem

samting tugeta. Ol aktiviti olsem ol piknik, kamping, ol famle projek, ol wok blong haos mo yad, swim, wok-baot, ol gudfala film mo ol narawan oli sam aktiviti nomo we famle i save mekem tugeta.

Wan famle we i laekem blong spenem taem tugeta long ol aktiviti bae oli save filim wan lav we i moa bigwan mo bae oli save go gud tugeta moa. Ol pikinini bae oli wantem blong lisin moa long papa mo mama blong olgeta mo folem ol advaes blong tufala taem oli filim moa kolosap long tufala. Bae ol papa mo mama oli save tijim gospel moa gud.



Fulfilim Ol Responsabiliti blong Famle



Misin blong Jos blong Lod i blong helpem evriwan blong kam long Kraes. Ol famle oli save help blong mekem misin ia i kam tru taem oli:

1. Givim evri nid blong olgetawan long saed blong spirit mo long saed blong bodi, mo taem oli help blong lukluk long ol nid blong ol narawan.
2. Serem gospel wetem ol narawan.
3. Luk se ol memba blong famle oli kasem ol tempol odinens blong olgeta mo oli help blong givim ol blesing ia long ol bubu we oli ded finis.

Ol Nid long Saed blong Spirit mo long Saed blong Bodi

Ol Nid long Saed blong Spirit

Pat we i stap fastaem long pat ia insaed long gaedbuk, "Tijim Gospel insaed long Hom," i tekem ol toktok long saed blong olsem wanem ol famle oli save lukaotem ol nid long saed blong spirit blong ol famle blong olgeta.

Ol Nid long Saed blong Bodi

Ol famle oli mas kam blong oli save lukaotem olgetawan mo oli no dipen long nara man, blong mekem se oli save gat evri samting we oli nidim long saed blong bodi mo blong oli save helpem ol narawan. Blong no dipen

long naraman, ol memba blong famle oli mas wantem wok. Wok hem i long saed blong bodi, long saed blong tingting, o long saed blong spirit. Wok i wan stamba samting we tru long hem wan i harem se hem i winim wan samting, hem i hapi, hem i tingting gud long hemwan, mo hem i save gat gud laef i go. Ol papa mo mama oli mas traem blong no dipen long naraman mo oli mas lanem ol pikinini blong olgeta tu long sem fasin. Taem oli no dipen long naraman bae i mekem se bae oli save helpem olgeta we oli stap long nid.

Ol papa oli responsibol blong givim ol samting we famle blong olgeta i nidim long laef mo givim proteksen. Ol mama oli responsibol nomo blong lukaotem mo fidim ol pikinini blong olgeta. Ol papa mo mama oli mas luk se famle i mas gat wan haos we i klin, i mas gat evri kaen kakae, ol klos, i mas gat tritmen blong helt mo blong tut, janis blong go skul, toksave blong lukaotem gud ol mane, mo, sapos i posibol, i mas save trenem olgeta pikinini long olsem wanem blong planem garen blong olgeta. Ol papa mo mama oli mas lanem ol pikinini blong olgeta olsem wanem blong rere long kakae blong ol mo olsem wanem blong putum gud kakae i stap.

Ol papa mo mama oli mas wantem wokhad blong givim ol nid ia long saed blong bodi. "Mo bae yufala i no letem ol pikinini blong yufala blong oli go hanggri, o neked" (Mosaea 4:14). Ol papa mo mama oli mas plan mo rere blong lukaotem ol nid blong

famle long taem oli sik, oli stap long wan disasta, oli no gat wok, o eni nara problem. Sapos papa i faenem hadtaem blong lukaotem ol nid blong famle blong hem mo sapos ol nara memba blong famle oli no save help, hem i save askem help long ol prishud lida blong hem.

Ol pikinini oli save help blong lukluk long ol nid blong famle long saed blong bodi taem oli helpem papa mo mama wetem wok blong olgeta, stadi gud long skul, lukaotem ol klos mo ol nara samting blong haos, lukaotem gud olgeta mo haos blong olgeta i klin oltaem mo stap long wan gudfala helt oltaem.

Ol memba blong famle oli mas kam antap long save blong olgeta blong mekem se oli save rid, raet gud mo blong oli save smol matematik mo oli mas holem evri janis we oli gat blong winim save mo mekem save blong olgeta i kam antap. Oli mas obei long Tok blong Waes mo oli kakae ol helti kakae. Long ol ples we hem i posibol, ol famle oli mas storem kakae blong wan yia, o putum kakae mo ol nara samting blong laef i stap, olsem we oli save mekem. Ol memba blong famle oli no mas mekem kaon we i no impoten, oli mas sevem mane blong fiuja, oli mas pem mo mekem evri samting we oli mas mekem, mo oli mas yusum wanem oli gat wetem waes mo no westem ol samting.

Ol papa mo mama oli mas tijim ol pikinini blong olgeta blong serem samting wetem ol narawan. Kolosap

evriwan i save givim wan smol samting, nomata wanem we oli gat i smol olsem wanem. Wan wei blong helpem ol narawan we oli stap long nid hem i blong livim kakae evri manis mo givim mane blong fast ofring, we oli stap yusum blong fidim olgeta we oli hanggri, givim haos long olgeta we oli no gat haos, putum klos long olgeta we oli no gat klos, mo mekem olgeta we oli harem nogud oli harem gud bakegen. Yumi soem lav blong yumi long Lod taem yumi helpem ol narawan. Hem i talem "Tru mi talem long yufala, taem we yufala i mekem olsem long wan brata blong mi, we i daon moa long ol narafala brata blong mi, be hemia i olsem we yufala i mekem long mi nomo" (Matiu 25:40).

Serem Gospel



Lod, tru long ol profet blong Hem blong Lata-dei, i bin tijim se evri memba blong Jos oli gat wok ia blong serem gospel wetem ol narawan. Hem i wok blong evri man mo woman we i bin kasem woning blong hem, blong oli givim woning long neiba blong

olgeta (luk long D&C 88:81). Alma, wan profet insaed long Buk blong Momon, i bin eksplenem se taem yumi baptaes, yumi mas glad "blong stanap olsem ol witnes blong God evri taem mo long evri samting, mo long evri ples we yufala i save stap long hem" (Mosaea 18:9).

Ol memba blong famle oli mas mekem evri samting we oli save mekem blong helpem ol famle, mo ol neiba blong oli lanem abaot gospel blong Jisas Kraes mo ol blesing we Hem i save givim long laef blong olgeta. Taem oli serem gospel, ol papa mo mama mo ol pikinini oli save mekem testemoni blong olgeta i kam strong moa mo oli save givim ol blesing blong gospel long ol narawan. Ol famle oli save:

- Stap olsem ol gudfala eksampol blong stap obei long evri komanmen (luk long Matiu 5:16).
- Stap talem tangkyu blong stap olsem wan memba blong Jos (luk long Rom 1:16) mo letem ol nara pipol oli save se oli ol memba.
- Askem olgeta we oli save olgeta, sapos oli wantem lanem moa long saed blong Jos.
- Askem Lod blong Hem i helpem olgeta blong selektem wan famle o wan man, woman o pikinini we i rere blong harem gospel.
- Mekem wan famle, o wan man o woman i save long Jos long sam wei, olsem taem yu invaetem hem long wan famle haos naet o long wan miting blong Jos mo long wan

aktiviti long Jos, givim buk blong Jos long olgeta o ol pamflet blong ridim, o tokbaot wetem olgeta long saed blong ol blesing blong gospel.

- Invaetem famle o wan man o woman insaed long haos blong olgeta blong ol misinari oli tijim olgeta.

Ol papa mo mama oli gat responsabiliti blong mekem olgetawan mo ol pikinini blong olgeta oli rere blong sevem ol ful-taem misin. Blong mekem ol pikinini, speseli ol boe oli rere, ol papa mo mama oli mas tijim gospel insaed long hom blong olgeta, gat famle skripja stadi mo skripja stadi blong wanwan man mo ol prea mo toktok plante long ol pikinini long saed blong ol wok mo ol blesing we wan i kasem taem hem i serem gospel. Olgeta oli save tijim ol pikinini blong olgeta blong sevem sam mane blong go long misin, blong wokhad, blong no dipen long naraman mo blong lavem mo sevem ol nara pipol.

Ol Tempol Odinens blong Olgeta we Oli Laef mo Olgeta we Oli Ded Finis

Insaed long ol tempol, ol memba blong Jos we oli klin inaf oli kasem ol tabu odinens blong mekem sam kavenan wetem God. Olgeta oli tekpat tu long odinens wok blong famle blong olgeta we oli ded finis. Long taem we i posibol, papa mo mama oli mas kasem wan tempol rekomen long prishud lida blong ol mo go long wan tempol blong kasem ol tempol

odinens blong olgetawan. Sapos oli no save go long wan tempol oli mas laef folem wan laef we i klin inaf blong oli save kasem wan tempol rekomen.

Ol famle oli gat tabu wok ia blong mekemsua se oli mekem ol tempol odinens blong olgeta famle blong olgeta we oli ded finis be oli no bin gat janis blong kasem ol odinens ia. Ol memba we oli kasem ol odinens blong olgetawan oli mas gobak long tempol plante taem, taem i gat taem, taem i gat ol rod, mo i gat taem long tempol blong mekem ol odinens blong ol bubu blong olgeta we oli ded finis.



Ol papa mo mama oli mas putum tugeta ol rekod blong olgeta we oli raetem long saed blong ol impoten taem we i tekem ples long laef blong olgeta mo tu, long laef blong ol pikinini blong olgeta, hemia i tekem tugeta ol setifiket blong blesing, bap-taes, odinens, mared, mo ded, ol impoten leta, ol foto, ol nius long

niuspepa; mo plante kaen samting olsem. Oli mas putum tugeta wanwan famle histri mo mas leftemap tingting blong wanwan memba blong famle blong kipim wan histri blong hemwan. Oli mas helpem ol yangfala blong oli statem histri blong olgetawan.

Ol famle oli mas putum tugeta ol infomesen long saed blong ol bubu blong olgeta mo putum insaed long ol famle histri. Oli mas stat blong putum tugeta infomesen blong fo jeneresen blong olgeta we i stap tedei.

Lidasip Trening



Anda long ol toktok blong stek, misin, o ol distrik lida, ol prishud mo okseleri lida oli mas tijim ol papa mo mama blong andastanem mo mekem ol tri besik responsabiliti blong famle (luk long ol pej 14–18). Ol lida oli sud tijim ol papa mo mama olsem wanem blong lidim ol famle blong olgeta. Sapos wan famle i stap long wan eria we i longwe, stek, misin, o ol distrik lida oli save lukluk sapos ol papa mo mama ia oli stap lanem mo fulfilim ol responsabiliti blong olgeta.

Holem Ol Wosip Seves long Hom (Blong Ol Famle we oli stap long Ol Eria we i Longwe)



Sam famle oli stap long ol eria we i stap longwe mo oli no save stap atendem oltaem ol miting blong wod o branj. *Wetem raet blong stek, misin, o distrik presiden*, ol kaen famle olsem oli save holem ol Sandei wosip insaed long haos blong olgeta nomo. Long ol eria we oli no gat ol Jos yunit, ol famle oli nidim blong kasem wan raet long Eria Presiden.

Wan papa o wan nara man we i gat prishud i save priperem mo blesem sakramen sapos hem i klin inaf, hem i wan pris insaed long Aronik Prishud o sapos hem i holem Melkesedek Prishud, *mo sapos hem i gat raet long ol prishud lida blong hem*. Eni man we i holem prishud i save pasem sakramen. Ol toksave long saed blong olsem wanem blong givim sakramen

i stap long ol pej 25–26 long gaedbuk ia.

Wan Sandei wosip seves i mas simpol, i mas gat reverens mo i mas gat big-fala respek. Long seves ia i save gat:

1. Fas hym
2. Fas prea
3. Blesem mo pasem sakramen
4. Wan o moa long ol samting ia:
 - Wan o tu sot toktok o testemoni
 - Ridim skripja mo toktok wetem famle
 - Wan lesen we i kam long wan memba blong famle
5. Las hym
6. Las prea

Blong mekem plan blong Sandei wosip seves, ol papa mo mama oli mas lukaotem mo folem gaedens blong Spirit blong Lod. Ol pipol blong Buk blong Momon oli bin givim wan eksampol long ol kaen seves olsem: "Mo ol miting blong olgeta . . . i bin lidim long fasin blong ol wok blong Spirit, mo tru long paoa blong Spirit; from olsem we paoa blong Tabu Spirit i lidim olgeta blong prij, o askem strong, o blong prea, o blong askem wetem tingting i stap daon, o blong singsing, semak olsem oli bin mekem" (Moronae 6:9).

Famle i mas yusum ol skripja olsem stamba gaed blong olgeta. Antap long hemia, famle i save yusum ol toktok blong ol jeneral konfrens, *Gospel Fundamentals*, *Olgeta Gospel Prinsipol*, *True to the Faith*, *Blong Ol Yut oli Kam Strong*, ol pamflet blong ol misinari, ol Jos magasin, mo ol narafala buk blong Jos mo ol video blong Jos.

Sapos i no gat wan insaed long famle we i gat stret prishud, papa o mama i

save mekem ol memba blong famle oli kam wanples blong oli singsing ol hym, oli stadi long ol skripja, oli prea, mo oli kam moa kolosap tugeta mo long Papa blong Heven. Prishud lida we oli putum hem blong lukaotem famle i mas putum sam taem blong famle ia i save kasem sakramen.

Ol papa mo mama oli mas holem sam aktiviti long wik, olsem wokbaot, ol piknik, ol film we i gud, visitim ol famle, spot, ol program blong gud miusik, mo swim.

Ol famle oli mas givim ol taeting, fast ofring mo ol nara mane long prishud lida we oli putum hem blong hem i lukaotem olgeta.

Famle i no givim ol ripot i kam long Jos, be prishud lida we oli putum hem blong hem i lukaotem olgeta, hem i mas intaviu long papa oltaem, mo askem hem blong talem olsem wanem famle i stap. Long ples we i gat telefon, ol lida oli save mekem ol intaviu ia long telefon.

Ol Odinens mo Blesing blong Prishud



Ol odinens blong prishud oli ol tabu wok we Lod i givim mo tru long atoriti blong prishud nao oli mekem ol wok ia. Ol blesing blong prishud oli givim tru long atoriti blong prishud, blong mekem ol sikman oli harem gud bakegen, blong mekem olgeta we oli harem nogud oli harem gud bakegen, blong leftemap tingting blong wan. Ol brata we oli mekem ol odinens mo blesing ia oli mas priperem laef blong olgetawan blong folem ol prinsipol blong gospel mo traem blong letem Tabu Spirit i lidim olgeta. Oli mas mekem wanwan odinens mo blesing long wan fasin we i hae mo i gat bigfala respek mo oli mas folem ol step ia; odinens i mas go olsem:

1. Mekem long nem blong Jisas Kraes.
2. Mekem wetem raet blong prishud.
3. Mekem folem ol stret fasin blong hem mo oli mas yusum ol spesel toktok o yusum tabu oel.
4. Wan prishud lida we oli putum hem we hem i holem olgeta ki bae i givim raet blong mekem ol tabu wok ia, sapos i posibol.

Ol odinens we i nid se bae wan prishud lida i givim raet blong mekem olgeta oli, blong givim nem mo blesem ol pikinini, mekem ol baptaes mo konfemesen, givim prishud mo odenem wan i go long wan ofis insaed long prishud, blesem mo pasem sakramen, mo dediketem ol gref.

Taem sam brata oli tekpat long wan odinens o blesing, wanwan long olgeta i putum lef han blong hem long solda blong narawan. Fasin blong stap invaetem plante brata we oli holem prishud blong givhan i no luk gud.

Ol odinens mo blesing we oli eksplenem olgeta long pat ia bae i save helpem ol papa blong oli wok olsem ol petriak insaed long ol famle blong olgeta.

Givim Nem mo Blesem Ol Pikinini



Evri memba blong Jos blong Kraes we i gat pikinini i mas karem ol pikinini blong hem i go long Jos, blong ol elda oli putum han blong olgeta antap long olgeta pikinini ia long nem blong Jisas Kraes, mo blesem olgeta long nem blong Sevyra (luk long D&C 20:70). Folem ol trutok blong revelesen ia, man nomo we i holem Melkesedek prishud mo i klin inaf i save tekem pat long odinens blong givim nem mo blesem ol pikinini. *Atoriti we i hed blong miting i mas givim raet blong oli mekem*

odinens blong givim nem mo blesem ol pikinini.

Taem oli blesem wan bebi, ol man we oli holem Melkesedek prishud oli kam raon mo oli holem bebi long han blong olgeta. Taem oli blesem wan pikinini we i bigwan, ol brata oli putum han blong olgeta slo nomo antap long hed blong pikinini ia. Man we i givim blesing:

1. I talem Papa blong Heven.
2. I talemaot se blesing ia oli mekem wetem raet blong Melkesedek Prishud.
3. I givim nem blong pikinini.
4. I givim wan prishud blesing olsem we Spirit i lidim hem.
5. I klosem long nem blong Jisas Kraes.

Baptaes



Folem toktok blong atoriti we i hed long miting, wan pris we i klin inaf o wan man we i holem Melkesedek prishud i save mekem wan baptaes. Blong hem i mekem olsem, hem:

1. I stanap insaed long wota wetem man, woman o pikinini we bae i kasem baptaes.
2. Blong mekem se man, woman o pikinini hem i sef, man we i mekem baptaes i holem raet han blong hemia we i blong kasem baptaes wetem lef han blong hem; man, woman o pikinini we i kasem baptaes i holem lef han blong man we i mekem baptaes wetem lef han blong hem.
3. I leftemap raet han blong hem long skwea.
4. I talem ful nem blong man we i kasem baptaes mo hem i talem, Jisas Kraes i bin komisenem mi blong mi baptaesem yu, long nem blong Papa, mo blong Pikinini, mo blong Tabu Spirit. Amen (luk long D&C 20:73).
5. Man we i kasem baptaes i putum han blong hem i blokem nus blong hem wetem raet han blong hem; man we i mekem baptaes i putum raet han blong hem biaen long bak-saed blong hem we i kasem baptaes, mo i draonem hem fulwan andanit long wota, hemia i tekem tu, ol klos blong hem we i kasem baptaes.
6. Helpem hemia we i kasem baptaes blong hem i kamaot long wota.

Tu (2) pris, o man we i holem Melkesedek Prishud oli mas witnesem baptaes blong mekemsua se oli mekem baptaes long stret fasin blong hem. Bae oli mas ripitim baptaes ia sapos man

we i mekem baptaes hem i no talem toktok i stret olsem we oli givim long Doctrine and Covenants 20:73 o sapos pat blong bodi o klos blong hemia we i kasem baptaes i no bin go andanit long wota. Hem we bae i baptaes mo man we bae i mekem odinens, tufala i mas werem ol klos we bae oli no save lukluktru long hem taem klos i wetwet.

Konfemesen



Ol konvet we oli gat naen yia o moa long naen yia, mo olgeta we oli gat eit yia we ol papa mo mama, tufala tugeta i no memba, oli konfemem olgeta long wan sakramen miting (luk long D&C 20:41). Wan eit yia pikinini, oli save konfemem hem stret afta long baptaes long ples we oli mekem baptaes long hem sapos nomo i gat papa o mama i wan memba blong Jos mo tugeta i givim raet blong kasem baptaes mo konfemesen. *Folem ol toktok*

blong bisop o branj presiden, wan o moa man we oli holem Melkesedek Prishud oli mekem odinens ia. Oli putum han blong olgeta slo nomo antap long hed blong hem we bae oli konfemem hem. Afta man we i mekem odinens i mekem olsem:

1. Talem ful nem blong hem i kasem konfemesen.
2. Talemaot se odinens ia oli mekem wetem raet blong Melkesedek Prishud.
3. Konfemem hem i kam wan memba blong Jos blong Jisas Kraes blong Ol Lata-dei Sent.
4. Givim hem presen we i Tabu Spirit wetem toktok ia "Kasem Tabu Spirit."
5. Givim wan prishud blessing olsem we Spirit i lidim.
6. Klosem long nem blong Jisas Kraes.

Givim Prishud mo Odenem Wan i go long Ol Ofis blong Prishud

Bisop mo branj presiden i stap lukluk long saed blong givim Aronik Prishud mo ol odinens long ol ofis blong dikon, tija mo pris. Bifo oli odenem wan man long wan ofis blong Aronik Prishud, bisop o branj presiden i mas intaviu long hem fastaem mo faenemaot se hem i klin inaf. Tu, oli mas sastenem hem insaed long wan sakramen miting. Wetem raet blong bisop o branj presiden, wan pris i save givim Aronik Prishud long wan naraman

mo odenem hem i go long wan ofis blong Aronik Prishud.

Stek o misin presiden i lukluk long saed blong givim Melkesedek Prishud mo odinens long ol ofis blong elda mo hae pris.



Blong givim prishud o odenem wan i go long wan ofis long prishud, tu (2) o moa long tu (2) man we oli holem stret prishud mo oli gat raet we i kam long atoriti we i prisaed oli putum han blong olgeta slo nomo antap long hed blong hem we i kasem odinens ia. Man we i mekem odinens i mekem olsem:

1. Talem ful nem blong man ia.
2. Talem raet (Aronik o Melkesedek Prishud) we oli mekem odinens ia long hem.
3. Givim Aronik o Melkesedek Prishud long hem, sapos man ia i no kasem fastaem.
4. Odenem man ia i go long wan ofis insaed long Aronik o Melkesedek Prishud mo hem i givim ol raet, paoa, mo atoriti blong ofis ia long hem.

5. Givim wan prishud blesing olsem we Spirit i lidim.
6. Klosem long nem blong Jisas Kraes.

Sakramen



Sakramen i wan odinens we i tabu tumas. Blong stap kakae sakramen, hem i givim janis blong tingbaot laef, ol tijing, mo Atonmen blong Jisas Kraes. Hem i wan taem blong riniu ol kavenan we yumi mekem wetem Lod long taem blong baptaes (luk long Mosaea 18:8–10)

Ol tija mo pris oli save priperem sakramen; ol pris oli save blesem; mo ol dikon, tija, mo pris oli save pasem. Ol brata we oli holem Melkesedek Prishud oli save priperem, blesem, o pasem sakramen. Be oli save mekem nomo taem i no gat inaf Aronik Prishud brata. Sapos wan man i brekem wan impoten loa, hem i no mas priperem, blesem, o pasem sakramen kasem taem hem sakem sin blong hem mo stretem samting ia wetem bisop o branj presiden blong hem.

Evri man we oli priperem, blesem, o pasem sakramen oli stap mekem odinens ia long bihaf blong Lod. Wanwan

long olgeta we i holem prishud i mas mekem wok ia wetem bigfala respek, mo gudfala fasin. Oli mas dresap gud, oli mas klin mo katem gud hea mo mustas blong olgeta. Stael mo fasin blong hemwan i mas soem olsem wanem nao odinens ia i tabu tumas.

Ol brata we oli priperem sakramen oli mas priperem sakramen bifo miting i stat. Oli putum bred we oli no brekem long ol klin trei blong bred mo putum ol trei blong ol sakramen kap we i gat fres wota long hem antap long tebol blong sakramen. Oli kavremap bred mo wota ia wetem wan klin, waet kaliko.

Long taem blong sakramen hym, olgeta we oli stap long tebol blong sakramen oli muvum kaliko aot long ol trei blong bred mo brekem bred i smolsmol. Afta long hym, man blong blesem bred i nildaon mo givim sakramen prea blong bred. Afta ol brata oli pasem bred long olgeta we oli stap, long wan kwaet fasin mo folem oda we i stap. Man we i prisaed long miting i tekem sakramen fastaem. Taem evriwan we oli stap oli gat janis blong kakae bred, olgeta we oli stap pasem oli karembak ol trei blong olgeta i go long sakramen tebol. Olgeta we oli stap blesem oli kavremap ol trei ia bak-egen afta we oli bin pasem bred finis.

Olgeta we oli stap long tebol blong sakramen oli muvum kaliko aot long ol trei blong wota. Man blong blesem wota i nildaon mo givim sakramen prea blong wota. Afta ol brata oli pasem wota long olgeta we oli stap.

Ol trei i gobak long tebol blong sakramen mo oli kavremap bakegen. Afta ol brata we oli stap blesem mo pasem sakramen oli sidaon wetem kongregesen.

Sakramen i blong ol memba blong Jos, i tekem tu ol pikinini. Man we i kondaktem miting i no mas talemaot se sakramen bae oli pasem long ol memba nomo; be yumi no mas blokem olgeta we oli no memba blong Jos blong oli tekem.

Ol prea blong sakramen, oli mas talem i klia gud, i stret mo wetem big-fala respek. Sapos man we i blesem sakramen i talem ol rong toktok mo hem i no korektem hemwan, bisop o branj presiden i mas askem hem blong stat bakegen mo talem i stret.

Prea blong blesem bred i go olsem:

“O God, Yu Yu Papa We I No Save Finis, mifala i askem Yu long nem blong Pikinini blong Yu, Jisas Kraes, blong blesem mo mekem tabu hemia bred, long ol sol blong olgeta evriwan we i kakae long hem; blong oli save kakae blong tingbaot bodi blong Pikinini blong Yu, mo witnes long Yu, O God, Yu Yu Papa We I No Save Finis, we oli wantem blong tekem long olgeta, nem blong Pikinini blong Yu, mo oltaem tingbaot Hem, mo holem ol komanmen blong Hem we Hem i bin givim long olgeta, mekem se oltaem oli save gat Spirit blong Hem i stap wetem olgeta. Amen.” (luk long D&C 20:77; mo Moronae 4).

Prea blong blesem wota i go olsem:

“O God, Yu Yu Papa We I No Save Finis, mifala i askem Yu, long nem blong Pikinini blong Yu, Jisas Kraes, blong blesem mo mekem tabu hemia wota, long ol sol blong olgeta evriwan we i dring long hem, blong oli save mekem samting ia blong tingbaot blad blong Pikinini blong Yu, we i bin ron from olgeta: blong oli save witness long Yu, O God, Yu Yu Papa We I No Save Finis, mekem se oltaem oli tingbaot Hem, blong oli save gat Spirit blong Hem i stap wetem olgeta. Amen” (luk long D&C 20:79; mo Moronae 5).

Oli mas karemaot sakramen stret afta long miting. Eni bred we i stap, oli save yusum olsem kakae.

Atoriti we i hed blong miting i mas givim raet long olgeta blong oli blesem mo pasem sakramen.

Dediketem Oel

Wan man (o moa long wan man) we i holem Melkesedek Prishud i dediketem klin oliv oel. Blong mekem i kam tabu. Stamba tingting blong hem i blong anoentem olgeta we oli sik mo olgeta we oli stap harem nogud. Man we i dediketem oel bae i mekem olsem:

1. Holem wan kontena blong oliv oel we i open i stap.
2. Talem Papa blong mifala long Heven.
3. Talem se hem i stap mekem wok ia wetem raet blong Melkesedek Prishud.

4. Konsekretem oel (i no kontena o botel) mo mekem tabu hemia oel blong anaentem olgeta we oli sik mo olgeta we oli harem nogud.
5. Klosem long nem blong Jisas Kraes.



Blesem Ol Sik Man

Ol man we oli holem Melkesedek Prishud nomo oli blesem olgeta we oli sik o oli harem nogud. I gud blong tu (2) o moa long tu (2) i blesem tugeta, be wan i save mekem hemwan nomo. Sapos i no gat oel we oli konsekretem, wan man we i holem Melkesedek Prishud i save givim wan blesing wetem atoriti blong prishud.

Wan papa we i holem Melkesedek Prishud i mas blesem ol memba blong famle blong hem we oli sik. Hem i save askem wan naraman we i holem Melkesedek Prishud blong i givhan long hem.

Blesem ol sik man i gat tu (2) pat long hem: (1) anoentem wetem oel mo (2) silim anoenting.

Anoentem wetem Oel

Wan man we i holem Melkesedek Prishud i anoentem hem we i sik. Blong mekem olsem, hem i:

1. Putum sam drop blong tabu oel ia long hed blong hem we i sik.
2. Putum sloslo nomo ol han blong hem antap long hed blong hem we i sik mo i talem ful nem blong hem.
3. Talem se hem i anoentem hem wetem raet blong Melkesedek Prishud.
4. Talem se hem i anoentem hem wetem oel ia we oli bin konsekretem blong anoentem mo blesem olgeta we oli sik mo olgeta we oli harem nogud.
5. Klosem long nem blong Jisas Kraes.

Silim Anaenting

I mas gat tu (2) o moa long tu (2) man we oli holem Melkesedek Prishud, oli putum han blong olgeta antap long hed blong hem we i sik. Wan long olgeta man ia i silim anoenting ia. Blong mekem olsem, hem i:

1. Talem ful nem blong hem we i sik.
2. Talem se hem i silim anoenting ia wetem raet blong Melkesedek Prishud.
3. Givim wan blesing olsem we Spirit i lidim.
4. Klosem long nem blong Jisas Kraes.

Ol Blesing blong Papa mo Ol Nara Blesing blong Mekem Wan i Harem gud mo Givim Kaonsel

Ol blesing blong papa mo ol nara prishud blesing oli givim, olsem we Spirit i lidim, blong soem rod mo mekem olgeta we oli harem nogud oli harem gud bakegen.

Wan papa we i holem Melkesedek Prishud i save givim ol blesing blong papa long ol pikinini blong hem. Ol blesing ia oli save helpem ol pikinini taem ol pikinini oli go longwe long hom, olsem taem oli go long skul o go long wan misin, o taem oli stat long wok, oli mared, oli go insaed long ami, o oli fesem sam smol hadtaem long laef blong ol. Ol blesing ia oli save stap olsem wan bigfala paoa blong famle. Wan famle i save rekodem ol blesing blong papa blong stap olsem ol rekod blong famle nomo, be oli no kipim insaed long ol rekod blong Jos. Ol papa mo mama oli mas leftemap tingting blong ol pikinini blong olgeta blong oli askem blesing we i kam long papa blong olgeta long taem we oli nidim.

Ol man we oli klin inaf we oli holem Melkesedek Prishud oli save givim blesing blong mekem wan i harem gud mo givim kaonsel long ol waef blong olgeta, long ol memba blong famle, o ol narawan we oli askem.

Blong givim wan blesing blong papa o ol nara blesing blong mekem wan i harem gud o givim kaonsel, wan man

we i holem Melkesedek Prishud, sapos hemwan nomo o wetem wan o moa man we oli klin inaf we oli holem Melkesedek Prishud oli putum han blong olgeta slo nomo antap long hed blong hem we i kasem blesing. Oli no yusum oel long ol kaen blesing ia. Man we i givim blesing i mekem olsem:

1. Talem ful nem blong hem we i kasem blesing.
2. Talem se hem i mekem blesing ia wetem raet blong Melkesedek Prishud.
3. Givim wan blesing olsem we Spirit i lidim hem.
4. Klosem long nem blong Jisas Kraes.

Dediketem Ol Gref

Wan man we i dediketem wan gref, hem i mas gat Melkesedek Prishud mo hem i *mas gat raet long prishud ofisa we i kondaktem seves.*

Blong dediketem wan gref, hem i:

1. Talem Papa long Heven.
2. Talem se hem i dediketem gref ia wetem raet blong Melkesedek Prishud.
3. Dediketem mo konsekretem graon ia olsem ples blong bodi blong hem we i ded i spel long hem.
4. Sapos i stret blong talem, hem i prea blong God blong i mekem graon ia i kam tabu mo Hem i protektem ples ia kasem taem blong Laef Bakegen long Ded.

5. Askem Lod blong kamfotem ol famle mo hem i talem ol nara tok-tok olsem we Spirit i lidim hem.
6. Klosem long nem blong Jisas Kraes.

Sapos famle i wantem, wan man (i gud sapos hem i wan man we i holem Melkesedek Prishud) i save givim wan prea long saed blong gref be i no wan prea blong dedi-ketem gref.

Blong Kasem Ol Jos Materi ol mo Ples blong Faenem Infomesen long saed blong Famle Histri

Ol lokol lida mo ol narafala memba
oli save kasem ol tul blong Jos, olsem
ol skripja, ol buk blong stadi, ol Jos
magasin, ol gamen, mo ol tempol
klos long Jos distribusen senta blong
olgeta nomo, o tru long Jos Intenet
saet, we yu save faenem long
www.lds.org.

Infomesen long saed blong famle
histri wok i stap insaed long famle
histri Intenet saet blong Jos,
we yu save faenem long
www.familysearch.org.

JOS BLONG
JISAS KRAES
BLONG
OL LATA-DEI SENT

